

# INUIT ATAQATIGIIT

## Inatsisartuni



08.April 2020

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaaattoq matumuuna saqqummiuppara.

### **Naalakkersuisunut apeqqutit:**

- 1. Nuallutip coronap kingunerisaanik ikorsiinissamut aningaasaliineq maannamut 257 mio. kr.-inik sinaakkuserneqartoq, Naalakkersuisut sulisartut sulusitsisullu kattuffii peqatigalugit ilusilersugaat, qanoq Naalakkersuisunit aningaasalersorneqarniarpa?**
- 2. Naalakkersuisut isumaqarpat ikorsiissutissatut aningaasaliissutaareersut saniatigut aningaasaleeqqinnerusoqarnissaa pisariaqartinneqassasoq?**
- 3. Paasinarsippat ikorsiissutinik sulinermi sinaakkusiussat amingartut, Naalakkersuisusut pissutsinut tulluussarneqarnissaannik suliaqassappat?**
- 4. Nunatsinni aningaasaliinerit annersaat, tassalu mittarfiliortiterneq, ikorsiissutissatut aningaasaliinissanut aallerfiginiarneqarpa?**
- 5. Nunatsinni aningaasaliinerit annersaat, tassalu mittarfiliortiterneq, maanna pisut aallaavigalugit, qanoq sunnerneqassava?**
- 6. Nunatsinni aningaasaliinerit annersaanni, mittarfiliortiternermi kommunet sa-naartornermi pisussaaqataanerat, soorlu aqquserniornissamut akisussaaf-feqernerat pissusissamisut ingerlallunilu aningaasalersorneqarnissaat kommunet pineqartut naammassisinnaavaat?**
- 7. Coronap tuniluunnerata kingunerisaanik nunatsinni takornariat appariarnissaat qanoq kinguneqassangatinneqarpa:
  - a. Nunatta karsianut?
  - b. Nunatta suliffeqarfiutaannut takornariaqarnermik tamakkiisumik ilaannakortumilluunniit sullisisunut, soorlu Air Greenlandimut?
  - c. Nunatsinni suliffeqarfinnut namminersortunut takornariaqarnermillu sulialinnut?**
- 8. Coronap kingunerisaanik inuussutissarsiutit allat qanoq sunnerneqarumaarnissaannut Naalakkersuisunit ilimagineqarpa?**
- 9. Nunatta suliffeqarfiutai coronavirusip nalaannerani aningaasanik tigoriaannarnik pisariaqartitsinertik ilisimatitsissutigisimavaat?**
- 10. Naalakkersuisut isumaqarpat nunatta suliffeqarfiutai Coronavirusip nalaani aningaasanik tigoriaannarnik pisariaqartitsilerumaartut?
  - a. Akissut aappiuppat suliffeqarfiit suut pineqarpat?
  - b. Aningaasallu qanoq annertutigisut naatsorsuutaappat?
  - c. Nunatta karsiata tigoriaannarnik aningasaataanut tamanna qanoq sunnuteqassava?**

## **11. Naalakkersuisut pisuni nalaatatsinni imaannaanngitsuni allanik paasissutisanik qanoq tunniussaqarsinnaappat?**

(Inatsisartuni ilaasortaq Aqqa Samuelsen, Inuit Ataqatigiit)

### **Tunngavilersuut:**

Nualluussuup coronap nunarsuarput tamakkerlugu atugaanerata kingunerisaanik, inuit peqqis-susaannut aamma ulluinnarni inuunerannut aningaasarsiornermullu annertuumik equin-erluppoq. Piffissarlu aggersoq sunniutai annertuumik peqqissutsikkut, inuuniarnikkut an-ningaasarsiornikkullu malugiumaarigut ilisimasallit naqissusersimallugu.

Aningaasarsiornikkut ilisimaleriikkatsinnik sunnerneqarnerluttussat pingaarcerit ilaat tassaap-put kiffartuussinermik suliaqartut, soorlu takornarialerisut. Ullumi nalaatatta kingunerisa ilag-ilereerpaat nunarsuaq tamakkerlugu angallannerup annertuumik appariaateqarnera. Tamanna nunatsinni takornarialerinermik suliallit maluginerlulereeraat aamma uppernarsarneqareerluni. Pissutsit taakku nalaatavut ukiorpanni taamak sunniuteqarnissaat ilisimasalinnit aamma siulittutigineqarmat siorngerlugit iliuuseqarfinginissaat pisariaqarpoq.

Piffissaq sivikitoq isigalugu suliffeqarfiiit eqqornerlunneqartut ikornejqarasuarnissaat pisari-aqarpoq. Sulisartut suliffissaaleqilinnginnissaat suliffeqarfiiillu akiliisinnaajunnaartitinnginnissaat anguniarlugu. Taamaaliussagaannilu aningaasanik naleqarpoq. Aningaasaliinerit aaliangiunne-qareersut nalilersorneqartariaqassallutik Kinguartinneqarallartariaqassallutilluunniit. Ilaatigullu aamma aningaasaliinerit coronap kingorna eqqornerlunneqartussat nalilersorneqartaria-qarsinnaassallutik.

Apeqqutigineqartut inuiaqatigiinni siunissatsinnut qitiusorujussuummata qinnutigissavara apeqquteqaatima ulla tuliffiusut qulit iluanni akineqarumaartut.